

LISTOVI...

GRAČANIČKI GLASNIK
časopis za kulturnu historijuBroj 57
Godina XXIX
Maj, 2024.
[str. 285-294]

© Monos 2024

LISTOVI...

Listovi gračaničkog kalendara od 14. 12. 2023. do 30. 4. 2024.

Omer Hamzić

14. 12. 2024.

Počela "Zima u Gračanici"

Programom manifestacije predviđeno je 19 raznovrsnih kulturno-zabavnih i sportskih događaja, prvenstveno za mlade Gračanlije, koji će biti izvedeni na tri lokacije: najviše na lokaciji "Zimski bazar", zatim u Bosanskom kulturnom centru i u gradu ispred Sahat kule. U okviru manifestacije, između ostalog, planiran je i doček Nove godine na otvorenom u centru grada, izbor sportiste godine, dvije pozorišne predstave itd. Manifestacija se završava 31. 1. 2024. godine sa zatvaranjem klizališne sezone. Organizator je Gradska uprava u saradnji sa Bosanskim kulturnim centrom, Turističkom zajednicom, Sportskim savezom i Vijećem mladih.

22. 12. 2023.

Fond za zaštitu okoliša Federacije BiH: javnim pozivom za 2023. godinu Gradu Gračanica odobrena sredstva u iznosu od 923.500,00 KM za realizaciju nekoliko komunalnih projekata

Kako je službeno saopšteno iz Gradske uprave, sredstva su odobrena za sljedeće projekte: Bušenje eksploatacionih bunara i izgradnja bunarskih zahvatnih objekata za potrebe vodosnabdijevanja grada Gračanica (600.000,00 KM), Izgradnja prioriternih dionica kolektorske mreže u Gračanici – faza II (98.000,00 KM), Integralno upravljanje otpadom na području grada Gračanica – faza 5 – nabavka žutih kanti za odvajanje korisnog dijela otpada od strane domaćinstava (220.000,00 KM), Izrada detaljnog energetskog audita na zgradi Grada Gračanica–stari i novi dio zgrade (5.500,00 KM). Također, na sredstva iz Fonda apliciralo je i JP "Komus" d.o.o. kome su odobrena sredstva za nabavku namjenskog vozila za odvojeno prikupljanje i odvoz selektiranog otpada u iznosu od 148.400,00 KM, dok je JP "Vodovod i kanalizacija" d.o.o. odobreno 70.400,00 KM za projekat "Poboljšanje efikasnosti sistema vodosnabdijevanja i smanje-

nje gubitaka primjenom IOT tehnologije u sistemu zonskih mjerenja, upravljanja i nadzora kao i očitavanja domaćinstava i privrede”.

27. 12. 2023.

Održana 34. sjednica Gradskog vijeća Gračanica: usvojen Budežet za 2024. i novo zaduženje Grada.

Budžet je usvojen jednoglasno, u do sada predviđenom rekordnom iznosu od 30.221.338 KM od čega je gotovo 50% predviđeno za kapitalne projekte i razvoj. U strukturi prihoda, porezni prihodi planirani su u iznosu od 12.786.177, neporezni prihodi u iznosu od 4.099.77, grantovi u iznosu 6.978.461 KM i primci u iznosu od 2.350.000 KM. Data je i saglasnot za novo dogoročno kreditno zaduženje 2.300.000 KM iz kojeg će se finansirati sljedeći projekti: Sanacija glavnog cjevovoda u Gračanici od Šumarije do Korića Hana – faza I (300.000 KM), Vodosnabdijevanje u MZ Lukavica (300.000 KM), Vodosnabdijevanje MZ Škahovica (250.000 KM), Izgradnja mosta prema Fiskulturnoj dvorani (500.000 KM), Rekonstrukcija ulice Alije Izetbegovića – centralna šetnica (300.000 KM), Kupovina zemljišta za Sajam poduzetništva (180.000 KM), Nabavka vatrogasne cisterne (350.000 KM), Vodosnabdijevanje MZ Donja Orahovica (70.000 KM), Vodosnabdijevanje MZ Miričina (50.000 KM). Osim ovih finansijsko-razvojnih dokumenta, gradski vijećnici su na ovoj sjednici prihvatili Lokalni akcioni plan za smanjenje energetskog siromaštva 2024-2027., te program rada Gradskog vijeća za 2024. godinu. Na kraju, “primili su k znanju” Informaciju o stanju zaštite građana od neeksplozivnih i minskoeksplozivnih sredstava na području grada Gračanica u 2023. godini.

28. 12. 2023.

Dodjela priznanja za inženjerski projekat ili proizvod izveden/proizveden u BiH “Made in BiH” za

2023. godinu – među dobitnicima i tri kompanije iz Gračanice

Radi se o priznanjima za najuspješnije proizvode, projekte, inovacije, zelene inovacije i tehnologije “Made in BiH” s ciljem podizanja osviještenosti i povezivanja inženjerske i privredne zajednice u predstavljanju najuspješnijih projekata, proizvoda, inovacija, zelenih inovacija i tehnologije u 2023. godini. To je, ustvari, najveće nacionalno priznanje koje jedan inženjerski projekat/proizvod može dobiti u BiH. Organizator manifestacije je KulturaMedia Sarajevo, u okviru VI Međunarodnih “BH sedmica inženjerstva”, u saradnji sa DOO “Colossem” Tuzla, Udruženjima inženjera u BiH i Udruženjem poslodavaca Federacije BiH. Priznanja su dodijeljena u 11 kategorija kompanijama iz cijele BiH. Među njima su i tri kompanije iz Gračanice: “Nermaris” d.o.o., Poslovna jedinica «Prometal» – osvojila je prvo mjesto u kategoriji *Inovacije, istraživanje i razvoj novih proizvoda*; “Metron Automation” d.o.o.–osvojila je prvo mjesto u kategoriji *Proizvodni inženjering, robotizacija, automatizacija industrijskih postrojenja* i “Širbegović inženjering” – osvojila je prvo mjesto u ukupnom plasmanu za koji se dodjeljuje inženjerska zvijezda, za projekte pod nazivom: “Inovativne AB betonske konstrukcije posebno dizajnirane za visokogradnju” (<https://www.akta.ba/vijesti/bih/171797/najuspjesniji-inzenjerski-projekti-i-proizvodi-osvojili-priznanje-made-in-bih>)

2. 1. 2024.

Umro Nijaz Alispahić, bosanskohercegovački književnik i dramaturg

Rođen je 1940. godine u Kozluku kod Zvornika, a studije jezika i književnosti završio je u Beogradu, a poslijediplomske studije u Sarajevu¹. Alispahić je završio jezika i književnosti u Beogradu te postdiplomske studije u Sarajevu. Godine 1973., inicirao je književnu manifestaciju “Kikićevi susreti”

u Gradačcu, a od 1978. godine radio kao dramaturg i umjetnički direktor Narodnog pozorišta u Tuzli. Njegova djela prevedena su na više stranih jezika, a zastupljen je i u Antologiji bošnjačke pripovijetke XX. stoljeća i Antologiji bosanskohercegovačke drame XX. stoljeća. Autor je brojnih književnih djela, od kojih ističemo sljedeće naslove: "Vatre stišane pjesmom" (1971.), "Vrtovi sirotog Halimije" (1979.), "Karakazan" (1996.), "Leda Saliniana" (1997.), "Sihirbaz" (1998.), "Hamdibeg" (1998.), "Sire, došli su ratnici" (1998.), "Hasanaginica" (1999.), "Tuzlansko sijelo u podne" (2000.), "Gola prsa protiv bajoneta" (1980.), "Životopis Ha Ha" (1980.), "Raja s Mejdana" (1986.), "Zmaj od Bosne" (1987), "Insani i ćuprije" (1995.), "Aska i vuk" (2002.), "Za dom penzionera spremni" (2003.)¹.

Alispahić je dobitnik mnogih priznanja, uključujući dvostruku nagradu "Ivo Andrić" za najbolju pripovijetku, nagradu "Zijo Dizdarević" za najbolju pripovijetku, te priznanje Zlatni lovor vijenac Direkcije Festivala MESS za doprinos umjetnosti teatra 2021. godine. Svoje radove objavljivao je u mnogim listovima i časopisima, između ostalih u Časopisu "Gračanički glasnik": *Atif Kujundžić, Pjesme o pticama*, "Print Com" Tuzla, 1999. (prikaz), Gračanički glasnik, V/9, 2000., 68; *Devet soneta (Jedna jeste Hasanaginica; Hasanaginica III; Bijel duvak na tabutu nose; Hasanaga; Hasanaginica VIII; Nisi došla, morala si doći; Rođendanski sonet; Sonet o smrti)*. Gračanički glasnik, V/10, 2000., 121-122; *Dvije pjesme (Mangala; Biranje glave)*. Gračanički glasnik, V/10, 2000., 2-7; *Hronika Saliniana (odlomci iz knjige "Sihirbaz", PrintCom Tuzla 1998., str. 161- 170 i 187 - 190)*. Gračanički glasnik, V/10, 2000., 123-129; *Atif Kujundžić, Muške, ženske i druge pjesme (prikaz), Javna biblioteka Lukavac, 2001.*, Gračanički glasnik, VI/12, 2001., 100. Alispahić je ukopan 4. 1. 2024. na mezarju Bukovčići u Tuzli.

22. 1. 2024.

Promocija 56. broja "Gračaničkog glasnika" – tema: "Ratni zločini nad civilima Gračanice (1992. – 1995.)"

Promocija je održana u prepunoj sali Dershane Osman-kapetanove medrese u Gračanici. Riječ je najobimnijem od svih dosadašnjih brojeva ovog časopisa: 343 stranice. Tema broja je "Ratni zločini nad civilima Gračanice (1992. – 1995.)" koja je izazvala veliku pažnju šire javnosti. U okviru te teme objavljeni su rezultati istraživanja koje je obavio istraživački tim Redakcije ovog Časopisa. Između ostalog, ukazano je na zastoj u procesuiranju ratnih zločina, kao i na činjenicu da za ubijenih 150 i ranjenih preko 350 civila na području Grada (općine) Gračanica nikada niko nije odgovarao. Naravno, ima većih stradalnika od Gračanice koja u tome nije nikakav izuzetak. Istraživanje je pokrenuto na inicijativu glavnog i odgovornog urednika ovog časopisa prof. dr. Omera Hamzića, a i realizovano je isključivo snagama i sredstvima Časopisa, bez ikakve pomoći i podrške nadležnih. Uz Hamzića, rezultate istraživanja potpisuje i Edin Šaković iz Gračanice, koji su i govorili na promociji. Gost promocije bio je magistar Ago Mujkanović, viši stručni saradnik Muzeja iz Tešnja, koji je predstavio rezultate istraživanja kao našu takozvanu "tešku baštinu". Istraživanje je imalo dva cilja: prvi je da se zapiše i otrgne od zaborava ono što se dešavalo tokom rata u prostoru Gračanice (kultura sjećanja) i drugi da se pokrene (potakne) procesuiranje počinjenih ratnih zločina koje je do sada potpuno izostalo. Prvi cilj je, što se tiče ovog časopisa ostvaren, drugi cilj ostao je "na čekanju". Ipak, shodno zaključku iz ovog istraživanja, odmah poslije promocije upućeno je pismo najodgovornijim osobama u lokalnoj vlasti Gračanice da potaknu procesuiranje zločina na svom području. U pismu se, između ostalog, kaže: "Smatramo da je dužnost i obaveza

predstavnik lokalne zajednice da izvrše snažan pritisak na pravosudne institucije, u cilju konačnog pokretanja sudskih postupaka i utvrđivanja odgovornosti onih koji su ubijali i ranjavali stanovnike Gračanice. Smatramo da je to prvenstveno dužnost i obaveza onih koje su građani ove lokalne zajednice izabrali kao svoje predstavnike i zastupnike: Gradskog vijeća i Gradonačelnika.” Sumnja se da će spomenuto pismo nešto pokrenuti. Neko reče: “Sve je na čekanju”

25. 1. 2024.

Održana 35. sjednica Gradskog vijeća Gračanica: odluka za zakazivanje tematske sjednice o problemima grijanja Gračanice, ostalo: programi i izvještaji

To je najvažniji zaključak ovog zasjedanja Gradskog vijeća jer se gračanica ove zime bukvalno mrzne usljed tehničkih i drugih problema u firmi “Eko toplane”. Šta se dešava i gdje je izlaz, kako je zaključeno, raspravljat će se na posebnoj tematskoj sjednici Gradskog vijeća koja će se održati 9. februara. U radu po dnevnom redu, razmatran je Zoning plan “Područje Sijedog krša”, Lokalni akcioni plan zaštite životne sredine Grada Gračanica (LEAP) 2024.-2027. godine, Odluka o visini naknade za rad članovima Gradske izborne komisije za fiskalnu 2024. godinu, Odluka o izmjenama i dopunama Odluke o visini takse za priključak na vodovodnu i kanalizacionu mrežu, Odluka o prodaji zemljišta, Program rada Gradonačelnika i gradskih službi za upravu za 2024. god., Program podrške razvoja poslovnog sektora Grada Gračanica 2024 – 2026., Izvještaj o radu Gradskog vijeća Gračanica i radnih tijela (komisija) u 2023. g., Izvještaj o rješavanju upravnih stvari u upravnom postupku u službama za upravu grada Gračanica u 2023. godini i Izvještaj o izvršenim procjenama.

25. 1. 2024.

U organizaciji Sportskog saveza obavljen izbor najboljeg sportiste i sportistkinje Grada Gračanica za 2023. godinu

Za *sportiste godine* proglašeni su Azer Musić RK “Gračanica” i Ajla Hidić ŽKK “G-Stars”. U ostalim kategorijama, najuspješniji su: *Muški kolektiv*: RK “Gračanica”; *Ženski kolektiv*: ŽKK “G-Stars”; *Junior/individualni*: Muhamed Šišić; *Junior/kolektivni*: Huso Avdagić; *Kadet*: Dino Oštraković; *Kadetkinja*: Merjem Džafić; *Pionir*: Benjamin Jahić; *Pionirka/individualni*: Lejla Duraković; *Pionirka/kolektivni*: Ema Čabrić; *Trener/individualni*: Ahmed Ćorić; *Trener/kolektivni*: Darko Mehmedović; *Sportski radnik*: Fadil Tubić; *Životno djelo*: Ibrahim Žunić; *Posebno priznanje*: Zaim Nurkić, Damir Doborac, Adi Mehmedćehajić, ARK “Gračanica” i JZU Opća bolnica “Dr.Mustafa Beganović”; *Posthumna priznanja*: Amir Glušac i Fuad Mujkanović *Osnovna škola*: JU Druga osnovna škola; *Nastavnik*: Šefik Memić; *Srednja škola*: MSŠ Gračanica; *Profesor*: Almir Devedžić (Službeni portal Grada)

26. 1. 2024.

Umro Hajrudin Junuzović, ugledni predratni društveni radnik, učitelj, slikar amater

U svom životnom vijeku radio je više poslova i obavljao prije rata (1992. – 1995.) nekoliko važnih funkcija u lokalnoj vlasti Gračanice. Rođen je 1934. godine u Malešićima, osnovnu školu završio u Gračanici, učiteljsku u Tuzli. Prvo zaposlenje dobio je u Osnovnoj školi u Malešićima, 1954. godine. Odatle je otišao na odsluženje vojnog roka u JNA, tokom kojeg je sudjelovao u šestomjesečnoj mirovnoj misiji UN na Sinaju u vojnom kontingentu Jugoslavije. Po dolasku iz JNA dobiva posao učitelja u Osnovnoj školi u Gračanici, otkada počinju njegove intenzivnije društveno-političke aktivnosti i radni angažman na odgovor-

nim dužnostima u društvenim djelatnostima Gračanice: Centar za socijalni rad, Narodni univerzitet, samoupravne interesne zajednice kulture i osnovnog obrazovanja, kraće vrijeme i u privredi ("Fortuna"), potom dužnost direktora u Osnovnoj školi "Hasan Kikić". Od političkih funkcija, bio je predsjednik Općinskog vijeća Saveza sindikata i Socijalističkog saveza. Radni vijek završio je na funkciji potpredsjednika Izvršnog odbora općine Gračanice, odnosno na predsjedničkoj dužnosti koju je preuzeo od Ćamila Naimkadića nakon njegovog odlaska na drugu dužnost, potom u mirovinu. Ostat će zapamćen kao posljednji predsjednik Izvršnog odbora općine Gračanica u tzv. socijalističkom periodu. Predao je dužnost novoizabranom predsjedniku Izvršnog odbora Brani Marušiću, nakon prvih višestranačkih izbora 1990. godine, kada su vlast u Gračanici ravnopravno podijelile SDA i SDS. Inače, tokom čitavog svog radnog vijeka, pa i u mirovini sve dok ga je zdravlje služilo aktivno je učestvovao u kulturnom životu Gračanice, posebno se isticao kao slikar amater, imao je više kolektivnih i individualnih likovnih izložbi, jedno vrijeme bio je na čelu KUD-a "Adem Alić" itd. Ukopan je 28. 1. 2024. na mjesnom greblju Režići. (opširnije u rubrici "Likovi zavičaja" u ovom broju našeg časopisa)

29. 1. 2024.

U Gračanici problemi s grijanjem: saopćenjem za javnost oglasila se "Eko toplana" koja gazduje gradskim grijanjem

Od početka grejne sezone jedan dio potrošača nezadovoljno je grijanjem, posebno oni u rejonu Srednjoškolskog centra i sjedišta Gradske uprave (kako je saopšteno oko 10% potrošača). S tim u vezi grijanje je bilo tema i na posljednjoj sjednici Gradskog vijeća Gračanica, te je donesena odluka da se 9. februara o tome održi tematska sjednica sa predstavnicima To-

plana. U međuvremenu, saopćenjem za javnost oglasila se «Eko toplana». Radi se o nepredviđenom kvaru na kotlovskim postrojenjima koji nije moguće otkloniti bez privremenog isključenja svih potrošača na mreži, pa je odlučeno da se od toga odustane. Potpuni remont i popravak planiran je tek na proljeće. Od oštećenih se očekuje razumijevanje. Za utjehu, do sad potrošenu energiju platit će smanjenom cijenom za 50% i "naoružati" se strpljenjem.

6. 2. 2024.

Gračanička kompanija "Index": za tri godine, tri nove i moderno opremljene proizvodne hale u Poslovnoj zoni Gračanice

Radi se o vlastitom ulaganju u iznosu od oko 25 miliona KM kako u poslovni prostor tako i u najmoderniju opremu i mašineza obradu metala i izradu veoma preciznih dijelova za najveće kompanije u Njemačkoj, Austriji, Norveškoj, Danskoj i SAD. Već je useljena prva hala i u njoj se radi punom parom, ostale će doći na red. U ovoj godini u dodatnu opremu uložiti će se još 2 miliona KM. Ovdje se proizvodi kvalitetan, konkurentan, uz to i precizan proizvod od nerđajućeg metala, pretežno za farmaceutsku i prehrambenu industriju. "Uvijek sam nastojao u svemu biti na visini, bez improvizacija. To tražim i od svojih uposlenika. U posljednjih nekoliko godina uložena su znatna sredstva u nabavku modernih strojeva i osavremenjavanje tehnološkog procesa. Mi radnike educiramo u našim pogonima. Uvijek, kad sam u prilici sugerisem na reformi našeg školstva. Bada je imati savremene mašine, proizvodne hale, ako to nije kompatibilno sa ljudskim resursima", izjavio je za "Dnevni avaz" utemeljitelj i generalni direktor ove renomirane bosanskohercegovačke firme. (Izvor: H. Čalić, "Dnevni avaz" 6. 2. 2024.).

9. 2. 2024.

Tematska sjednica Gradskog vijeća: nakon "vruće" rasprave o

problematici sa gradskim grijanjem – radijatori u jednom dijelu grada ostaju hladni do sljedeće sezone.

Po svoj prilici to je rezultat sjednice kojom je Gradsko vijeće iskazalo “brigu za građane” i omogućilo im da saznaju o čemu se zapravo radi. Prema riječima Seada Hamidovića, koji je došao na sjednicu ispred “Eko toplana” “pred aktuelnu sezonu grijanja instaliran je novi kotao kako bi se dodatno unaprijedio sistem daljinskog grijanja i obezbijedila ekonomičnija potrošnja energenta – biomase, a koji nije radio u potpunosti ispravno. Nakon dva prekida u isporuci, na pojedine stambene objekte ugrađene su dodatne pumpe, a s obzirom da se radi o 5 do 10% korisnika koji nemaju urednu isporuku, menadžment je odlučio da ne pristupa potpunom remontu jer bi u tom slučaju čitav grad ostao bez grijanja, u još uvijek, zimskom periodu.” Na Vijeću je bilo još neke “prazne priče”, od koje neće biti nikakve koristi. Nezadovoljni potrošači makar znaju na čemu su. Možda će i sud tu imati posla.

22. 2. 2024.

Glavni urednik “Gračaničkog glasnika” posjetio Reisul-ulemu Huseina ef. Kavazovića

Tokom razgovora obavijestio je Reisul-ulemu o projektu “Gračanički glasnik”, koji se uspješno realizuje već skoro trideset godina kao specifična i korisna periodika u Bosni i Hercegovini na području kulturne historije. Fokus razgovora bio je na temi posljednjeg, 56. broja u kojem je iz posebnog kritičkog ugla obrađena problematika procesuiranja ratnih zločina u Bosni i Hercegovini. Reisul-ulema je čestitao izdavaču i Redakciji Časopisa na dosadašnjim rezultatima, sa željom da uspješno nastave svoju misiju, uz konstataciju “da bi sličnu publikaciju trebala imati svaka općina u našoj zemlji (...) što bi predstavljalo značajan doprinos ukupnoj bosanskohercegovačkoj kulturnoj sceni i kulturnoj i historijskoj ba-

štini naše zemlje”. Glavni urednik Hamzić ovom prilikom poklonio je Reisul-ulemi nekoliko brojeva Časopisa i drugih publikacija Izdavačke kuće “Monos” iz Gračanice (Izvor: Preporod. Info).”

24. 2. 2024.

Umro Mehmed Alić zv. Gljiva, gračanički slikar amater

Rođen je 1945. godine u Gračanici, gdje je završio osnovno i srednje obrazovanje, potom je više godina, trbuhom sa kruhom, proveo na radu u inostranstvu. Slikarskom se počeo baviti još i osnovnoj školi i sa bojom i kistom nastavio se družiti kroz čitav život, uz svoje redovne poslove, kao slikar amater. U sekcijama slikara amatera KUD-a “Adem Alić” proveo je punih 20 godina. Nastupao je na mnogim kolektivnim izložbama i priredio dvije samostalne: prvu 2003., a drugu 2004. godine. Na otvaranju posljednje izložbe, 4. 8. 2004. u BKC Gračanica, književnik Atif Kujundžić je između ostalog rekao da Mehmed Alić “ima snažno i stvarno osjećanje za kompoziciju, sklad i ravnotežu, osjećaj za balans i simetriju koji će se na slici postvariti kao mjera, a koja će poroditi i estetski ugođaj (...) U izboru motiva i načinu njihovoga artikuliranja na slici, vidimo kako je Alić nadahnut djelima starih majstora, čak i u nivou kolorističke prenaglašenosti, impresionistički. Ako slika ljeto – ono gori. Ako je to jesen – ona plamti. Ako je to zima – ona ledi. Ako je proljeće – ono se otvara i bokori uzduž i poprijeko.” U broju 18 “Gračaničkog glasnika” objavljena je kolekcija slika sa spomenute izložbe i cjelovit osvrt Atifa Kujundžića tim povodom. Mehmed Alić je ukopan 25. 2. 2024. na mjesnom mezarju “Šabuša»

28. 2. 2024.

Održana 36. sjednica Gradskog vijeća Gračanica: pozitivno ocijenjen rad gradonačelnika o radu u 2023. godini, odobreno povećanje cijena za odvoz smeća privrednim subjektima,

početak zatvaranja deponije na Grabovcu

Radi se o povećanju za 40% sa obrazloženjem da je došlo do povećanja troškova zbrinjavanja smeća nakon odluke da se, nakon pretovara na postojećoj deponiji, smeće odvozi na deponiju u Doboju – što je, kako je saopšteno privremeno rješenje do aktiviranja regionalne deponije u Živinicama. Time je označen i početak zatvaranja deponije smeća na Grabovcu koja se nalazi na samom ulazu u Gračanicu iz pravca Doboja. Kako je rečeno, oko ovog povećanja obavljena je i konsultacija sa Udruženjem poslodavaca Gračanica. Što se tiče privatnih domaćinstava, za sada ostaju na istom nivou, s tim što će po tom osnovu biti izvršena kompenzacija spomenute razlike u troškovima iz gradskog budžeta u iznosu od 200.000 KM za ovu godinu, što neki povezuju i sa izborima. Inače, cijene nisu mijenjane još od 2005 godine, ali svako njihovo povećanje, opravdano ili neopravdano, nailazi na kritike i negodovanje u javnosti.

Iako su usvojeni bez veće diskusije posebnu i mnogo veću pažnju zaslužuju izvještaji o odabiru projekata po dva javna poziva: prvi, za omladinske i nevladine organizacije (36 projekata za 32 nevladine organizacije i 4 fondacije) i drugi za sportske kolektive u 2023. godini. Za ove namjene iz budžeta je plasirano ukupno 509.460 KM, od čega za omladinske i druge organizacije 54.260 KM ili 9,4%, a za sportske kolektive 455.200 ili 90,6%. Od toga je za nogometne klubove izdvojeno 289.000 KM ili 63,5% od ukupne sume izdvojene za sport. Iz te sume NK "Bratstvo" povukao je 190.000 KM ili 42%, a Rukometni klub "Gračanica" 105.000 ili 23%. Ta dva kluba potrošili su 65% od ukupno odobrenih sredstava za sportske kolektive. Dakle, za fudbal odobreno je 11 projekata, za košarku – 2 rukomet – 2, atletiku – 1 biciklizam – 1, borilački sportove – 2, odbojku 1

i šah 1 projekat. Sami ovi brojevi ukazuju na mnoge neravnomjernosti i nesklad u razvijenosti pojedinih sportova, već i između sportskih kolektiva i omladinskog i nevladinog aktivizma (u kojem dominiraju projekti iz oblasti kulture).

29. 2. 2024.

U Gračanici obilježen Dan državnosti Bosne i Hercegovine

U povodu 1. marta, Dana nezavisnosti Bosne i Hercegovine delegacije i građani su položili cvijeće na Centralno spomen obilježje poginulim borcima i šehidima, Spomen kosturnicu borcima NOR-a i bistu Josipa Broza Tita. Održana je i uobičajena Svečana na kojoj je prigodan referat pročitao gradonačelnik Nusret Helić. U revijalnom dijelu programa nastupile su gračaničke Arabeske. Na sam dan 1. marta, organizovano je još nekoliko kulturno-zabavnih i sportskih programa u nekoliko mjesnih zajednica (Pribava, Lukavica i dr.)

1. 3. 2024.

Predata na upotrebu novoizgrađena džamija na Bulakovom sokaku – Gračanica

Džamiju je vlastitim sredstvima i uz podršku još nekoliko privrednika, dakako u saradnji sa Međzlisom Islamske zajednice Gračanica izgradio poznati gračanički privrednik Faruk Širbegović. Vanjske dimenzije džamije su 12x18 metara, a u molitvenom prostoru ima 130 mjesta. Vanjski prostor za klanjanje dženaza površine je preko 500 m² i može primiti 700 osoba. Na istoj lokaciji projektovan je još i objekat budućeg međzliisa i galsuhane koji će se graditi u drugoj fazi projekta. Završetak ovog hajr objekta označen je prvom džumom i predajom ključeva džamije na upotrebu Islamskoj zajednici. Ovom svečano činu prisustvovali su brojni visoku gosti, među kojima je i Reisu-l-ulema Husein ef. Kavazovi, koji je i predvodio Džuma namaz, zatim muftija tuzlanski Vahid ef. Fazlović, predsjednik Sabora IZ u BiH Edhem

Bičakčić, predstavnici Medžlisa IZ Gračanica, džematlije, kao i svi koji su radili na izgradnji džamije. Ovom prilikom uručene su vakufname vakifima Sabitu Koriću i Faruku Širbegoviću.

Tekst na ulaznom portalu džamije na jezgrovit način izražava nijet vakifa Širbegovića:” U ime Allaha Milostivog, Samilosnog! Izgradih ovu džamiju za dobrobit naroda i vjere kojoj pripadam i domovine koju volim, Uz zahvalnost precima koje poštujem i amanet potomstvu kojem svako dobro želim. Allah vidi ono što radimo.”

8. 3. 2024.

Završena temeljna adaptacija Čiriške džamije – jedne od najstarijih u Gračanici

Tim povodom, u prisustvu brojnih džematlija i gostiju iz Medžlisa islamske zajednice klanjana je prva Jacija namaz, pročuen Mevludi šerif i izveden prigodan vjerski program. Ovo je stara gračaničke mahalska džamija, koja je u prošlosti imala nekoliko adaptacija, od kojih je posljednja izvršena 1985. godine. Osim glavnog imama Smaje ef. Mustafića, ovom prilikom prisutnima se obratio i poznati gračanički privrednik Nešad Šabić, predsjednik Građevinskog odbora i jedan od najvećih donatora, koji se zahvalio svima koji su na bilo koji nain pomogli ovaj hajr projekat.

23. 3. 2024.

Umro Abdulah Sidran, veliki bosanskohercegovački književnik i akademik

Umro je nakon kraće bolesti u 80 godini života... Ukopan je 27. 3. u haremu Gazi Husrev-begove džamije. Puno velikih riječi izgovoreno je o tom bosanskohercegovačkom velikanu, ali zaslužio je i više “od priče” dok je bio živ. Srećom, ostaje da živi njegovo djelo. U neka mlada doba dolazio je i u Gračanicu kao “aktivista” lijepe riječi. Mali je ovaj časopis da bi u njega mogla

stati takva jedna veličina. Potpisnik ovih redova imao je posljednji “susret” sa Sidranom 25. maja 2023. godine, kada je pred Centralnim spomen-obilježjem poginulim borcima i civilnim žrtvama Gračanice držao “prigodan govor po zaduženju”. Desilo se da je “iskočio” iz uobičajene šeme takvih govora i “prigodničarstva”. Kao roditelju dječaka kojeg je ubila četnička granata 14. 12. 1993. godine i čije je ime ispisano na spomeniku, među ostalih 150 ubijenih civila (1992. – 1995), morao je progovoriti drugačije. Kad mu je ponestalo riječi da iskaže svu svoju bol, pozvao je u pomoć Sidrana i pročitao njegovu pjesmu “Otvaranje izložbe slika” (govor na otvaranju izložbe slika Mehmeda Zajimovića u Galeriji “Roman Petrović”, Sarajevo 31. 10. 2006.), koju je veliki pjesnik posvetio slikaru, autoru izložbe, ocu poginulog sina u ratu:

*“Izgubiti toliko
Koliko je Meho
Avgusta devedeset pete
Izgubio
Kad mu četnička granata
S našeg Trebevića
Ubi sina Karima
Izgubiti toliko
a ostati živ
pripameti ostati
na nogama ostati
sačuvati dar i snagu
mogu samo rijetki
oni koji
svojim darom
svojom snagom
i svojim radom
kod Gospodara zasluže
da im prepusti
dio svojih nadležnosti...”*

To je samo dolomak iz Sidranove pjesme u kojoj je potpisnik ovih redova našao

sebe.¹ Da ništa više taj čovjek nije u svom životu napisao bio bi i ostao veliki.

28. 3. 2024.

Održana 37. sjednica Gradskog vijeća: pozitivna ocjena rada javnih ustanova, prihvaćeni prijedlozi plana upisa učenika u Mješovitu srednju školu i Gimnaziju

Od 16 tačaka dnevnog reda, vrijedi spomenuti, vrijedi spomenuti Izvještaj o izvršenju gradskog Budžeta u 2023. godini koji je ostvaren u iznosu od 25.824.431 KM ili 10,44% manje od plana, a 11% više u odnosu na prethodnu 2022. godinu. Usvojen je i Nacrt odluke o lokaciji Gradskog groblja na lokaciji Hajrino brdo (područje mahale Drafnići), o kojoj će biti još rasprave. Donesena je i odluka o subvencioniranju stanarina, kao i pravilnik o upravljanju i održavanju objekata koji su predviđeni za neprofitno scijalno stanovanje. Usvojen je plan upisa učenika u prvi razred Mješovite srednje škole (480 učenika u 20 odjeljenja tehničke i stručne škole) i Gimnazije “dr. Mustafa Beganović” Gračanica (72 učenika u 3 odjeljenja) za školsku 2024/25 godinu. U takozvanom izvještajnom dijelu sjednice jednoglasno su prihvaćeni izvještaji o radu i finansijskom poslovanju u prošloj godini Doma zdravlja i Gradske apoteke, te Centra za socijalni rad, Dječijeg obdaništa i Bosanskog kulturnog centra. Kako je za medije izjavio Predsjedavajući Gradskog vijeća Mirzet Topčagić, “izrečene su velike pohvale od strane vijećnika na rad uposlenika i menadžmenta javnih ustanova. Vidi se, zaista da su respektabilni rezultati ostvareni u izvještajnoj godini...”

6. 4. 2024.

Obilježen 7. april, Dan oslobođenja Gračanice u Drugom svjetskom ratu: otvorena zavičajna zbirka Gradske biblioteke

Iz “praktičnih” razloga obilježavanje je obavljeno dan ranije i to uglavnom po uobičajenom protokolu. Prvo su predstavnici gradske uprave i boračkih organizacija položili cvijeće na spomen obilježja u gradu, a potom je u BKC održana svečana akademija na kojoj je prigodan referat pročitao predsjedavajući Gradskog vijeća Mirzet Topčagić. Nakon toga, izveden je kraći kulturno-umjetnički program. Svečanost je praćena otvaranjem Zavičajne zbirke Narodne biblioteke “Dr. Mustafa Kamarić” i izložbom “Uspomena na omladinske radne akcije”, koju je pripremio Edin Šaković, u holu Bosanskog kulturnog centra.

15. 4. 2024.

U Gračanici obilježen Dan armije Republike Bosne i Hercegovine

Uz polaganje cvijeća boračkih i drugih organizacija kao i lokalnih zvaničnika, ispred Centralnog spomen obilježja u Gračanici, prigodan govor je održao gradonačelnik Nusret Helić, naglasivši da je za Bosnu i Hercegovinu svoje živote dalo 325 boraca s područja Gračanice, da bismo svi mi danas uživali slobodu. Te žrtve nas obavezuju “da ne šutimo o tom vremenu, da ovo što znamo prenosimo mlađima”. Kratkim podsjećanjem na nastanak Armije i uz prigodne poruke, Dan Armije RBiH čestitao je i predsjednik Gradske organizacije demobilisanih boraca, Rahim Imamović. Delegacija boračkih organizacija Gračanice prisustvovala je centralnoj manifestaciji za Tuzlanski kanton koja je održana u Banovićima.

¹ Vidi opširnije: Omer Hamzić, Govor održan pred centralnim spomen-obilježjem poginulim borcima i civilnim žrtvama oslobodilačkog rata 1992. – 1995., u povodu Dana odbrane, 25. 5. 2023., *Gračanički glasnik* br. 56/23, Gračanica, 2023., 121–124

27. 4. 2024.**Udruženje - Humanitarna organizacija Međunarodni forum solidarnosti – “Emmaus” iz Klokočnice (Doboj Istok) - 25. godina uspješnog rada.**

Tim povodom je u Klokočnici organizovana svečanost na kojoj je Udruženje predstavilo svoj rad i zahvalilo se partnerima, donatorima i prijateljima sa kojima je ostvarilo posebnu saradnju i koji su dali veći doprinos radu Udruženja. Sve je počelo prije četvrt vijeka, skromno, tada malim, ali iz današnje perspektive gledano, velikim koracima. Svojim djelovanjem Udruženje je davno prevazišao granice lokalne zajednice, kantona pa i države. To je organizacija koja saraduje sa prijateljima, donatorima, udruženjima, državama iz svih dijelova svijeta. I većina njih je prisustvovala obilježavanju ove godišnjice. Gosti su prvo odgledali promotivni video u kojem je hronološki prezentirano sve ono najbitnije ostvareno od osnivanja do 25. rođendana Udruženja. Nakon toga najistaknutijim prijateljima, koji su svojim radom i zalaganjem zaslužili posebno mjesto u historiji ove organizacije, dodijeljena su priznanja i zahvalnice. Delegacije su zatim posjetile centar Duje, gdje su se svi na terenu mogli uvjeriti dokle je MFS “Emmaus” stigao u proteklom periodu. “Emaus” - to je danas doista velika priča... (prema izvještaju Radio Gračanice)

30. 4. 2024.**Održana 38. sjednica Gradskog vijeća: usvojena jedna odluka i nekoliko izvještaja i informacija – uglavnom, stanje redovno**

Riječ je o prijedlogu odluke o kandidovanim projektima za program javnih investicija Federacije BiH za period 2025. – 2027., koje navodimo doslovno, kako su formulisani u toj odluci. Projektne ideje: (1) Deminiranje kontaminiranog područja grada Gračanica, (2) Izrada Glavnog projekta kanalizacione mreže za područje grada Gračanica (3). Toplifikacija grada Gračanica III faza i (4) Regulacija korita rijeke Sokoluše: most Etivaža – Propust M4 (u industrijskoj zoni); istom odlukom kandidovani su sljedeći projekti: (1) Sanacija deponije komunalnog otpada Grada Gračanica (II faza), (2) Čišćenje korita i povećanje proticajnog profila rijeke Spreče, (3) Regulacija rijeke Spreče - dionica uzvodno od ušća rijeke Sokoluše u rijeku Spreču do mosta za Kakmuž (4) Restauracija i konzervacija na građini “Stari grad Soko” u Sokolu. Šta će i da li će se nešto od ovoga i realizovati, kao i uvijek, pokazat će vrijeme. Od izvještaja, najvažniji je onaj o izvršenju Budžeta Grada za prva tri mjeseca, po kojem je u tom pogledu “stanje redovno”. Prema izvještajima o radu i finansijskom poslovanju, u radu javnih preduzeća “Vodovod”, “Komus” i Veterinarska stanica, nije bilo većih problema. Gradsko vijeće razmatralo je i usvojilo izvještaj o radu vijeća mjesnih zajednica u prošloj godini i informaciju o dodjeli stipendija učenicima srednjih škola i studentima za školsku 2023/2024.